

www.BibleForChildren.org

Mataayo 8



Mbe, hanú gyahita eginsiku ebhiri, yaakoreka enyangi eya obhwenga mumugi gwa Kana, mukyaro kya Gariraaya. Mubhwenga bhuyo, ng'ina waabho Yeesu, yaaringa-mo. Yeesu wonse hamwi na abheehigira bhaaye, bhaaringa bharaarikirwe mubhwenga bhuyo.



Hanú edivai yonsego yaahwa, ng'ina waabho Yeesu akamukeerya Yeesu ega, "Edivai ebhahwereeri."
Nho, ng'ina waabho akakeerya abhakori bha emirimu ega, "Ryoryonse rinú araabhakeerye, mukore."



Kimwi Yeesu akabhakeerya abhakori
bha emirimu bhayo ega, "Mwijurye amanji
muginyungu muyo." Bhonse bhakagiijurya
amanji jabhi. Akamara akabhakeerya
ega, "Bhoono, mutahe amanji mumuhirire
omwimiririri wa enyangi."
Bhonse, bhakamuhirira.



Omwimiririri wa enyangi akarabha amanji ganú Yeesu yaaringa ahunjwiri, gabheeri edivai. Weeki ataamanya enú edivai iyo, yaaringa erwiri, nawe, abhakori bha emirimu bhanú bhaaringa bhatahiri amanji muginyungu, bheeki bhaamanya enú edivai erwiri. Nho, omwimiririri wa obhwenga uyo, akamubhirikira omuteti.




Akamukeerya ega, "Kira omukori wa enyangi, araamba okubhahaana abhageni edivai enjomu mbere. Hanú oranyoora abhageni bhamariri okunywa na okwiswa, nho, arareeta inú etaringi enjomu. Nawe, uuwe oreeteri edivai enjomu bhukong'u kubhuteero!"




Yeesu yaakora ekimanyiiriryo kiyo,
mumugi gwa Kana mukyarwo kya
Gariraaya. Ekimanyiiriryo
kiyo kyaringa kya okwamba
okoorokya obhukuru
bhwaye, na abheehigira
bhaaye bhakamwikirirya.



Kimwi Yeesu akahika owa Petero.
Hanú yaasoha munyumba, akanyoora
ng'inabhyara waabho Petero areeri
kubhuriri, yaana ehooma enduru.



Yeesu akamukuun'ya okubhoko, rumwigo akahwena ehooma irya. Nho, akeemuka, akaamba okumukorera ebhyakurya Yeesu.




Hanú yaahika mugoroobha, eryubha rimariri okusikira,
abhantu bha mumugi muyo,
bhakareetera Yeesu
abharweri abhaaru,
na bhanú bhaaringa
bhagwatirwe na
ebhihwi ebhibhiibhi.
Abhantu abhaaru
okurwa mumugi guyo,
bhakeekuman'ya
mukiseku kya
enyumba ya
Simoni na
Andurea.



Yeesu akabhahwen'ya abhantu abhaaru, bhanú
bhaaringa na amarweri amanga amaarú. Kweki,
akakenyia ebhiihwi ebhibhiibhi ebhyaru, nawe,
ataabhiikiririyanga ebhiihwi bhiyo bhihaire,
kwa okubha bhyaringa bhimumanyiri ega,
weeki m-Mwana wa Waryubha.



Abhantu bhayo bhonsego, bhaaringa bhareenda okumukuun'ya, kwa okubha yaaringa na eginguru gya okubhahwen'ya.



Hanú yaaringa araraarika, bhakaaja abhantu bhane, bhagegeri omurweri wa omujimu.



Bhakatamwa okumuhikya hanú
Yeesu yaaringa, kwa ekisigo
kya omuganda omunene gwa
abhantu bhanú bhaaringa
bheekumeen'ye
mukiseku
harya.



Kwa ego, bhakariina engaji
okugya eguru kurusara rwa
enyumba, bhamugegeri
omurweri uyo
kwisayenge ryaye.



Bhakatobhora, bhakamwituumya
omurweri aringi kwisayenge,
bhakamuhikya hanú Yeesu
yaaringa.




Hanú Yeesu yaarora ekikorwa kya abhantu bhayo,
akamanya ega, bhaaringa na
eimani. Akamukeerya
omurweri uyo ega,
“Omwana waani,
wabhiirwe
obhusarya bhwaho.”
Hanú yaamara
okugamba gayo,
akamukeerya
omurweriuyo ega,
“Ndakukeerya ega,
imirira, witiike
erisayenge ryaho,
ogende iika owaaho!”



Mbe, Yeesu hamwi na abheehigira
bhaaye, bhakariina mubhwato. Hanú
bhaahika gatigati ya enyanja,
rumwigo omuyaga omuhaari
bhukong'u gukeebhuka
na amabhooka gakaamba
okukundikirya obhwato.
Nawe, Yeesu yaaringa
areeri egintiro.



Yeesu akabhakeerya ega, "Bheenyu abhantu bha eimani enke, kwaki muroobhoha?" Nho, akeemuka, akakemera omuyaga na enyanja. Rumwigo, enyanja ekatenda. Abheehigira bhaaye bhakaruguura, bhakagamba ega, "Omuntu unu ng'-wa egaki? Kora omuyaga na amabhooka, bhiramwigwa!"



Waryubha yaahanja bhukong'u abhantu
bhonsego bha mukyaró. Kiyó nkýo
kyakora akatuma Omwana waaye
omumwemwe yaaje mukyaró, naho,
kíra omuntu unú aramwíkirirya
atabhura, nawe, abhe na
obhuhóru bhwa
koko.



Abharuumi 3:23

kwa okubha abhantu bhonsego bhaakora obhusarya, na okusuuhirwa na obhukuru bhwa Waryubha.

Abharuumi 6:23

Omuntu wowonse unú m-mugaya wa obhusarya, amariho gaaye, n-duku rwa koko. Nawe, bheetu Waryubha aratuhaana obhuhoru bhwa koko. Obhuhoru bhuyo bhutaringi amariho, nawe, m-mutuhó gunú turanyoora okuhitira Kiristu Yeesu, Omukuru weetú.

Abhaebhurania 9:27

Kira omuntu areenderwa okukwa rumwigo, na hanú amariri okukwa, arabhaturirwa ekiina na Waryubha.



Abhaefeso 2:8,9

Waryubha yaabhatuurya kwa eriruguto ryaye,
kwa okubha mwamwikirirya Yeesu Kiristu.
Obhutuurya bhuyo, bhutakurekana na ekituunyo kyenyu
abheene, m-mutuhó gwenyu okurwa ku Waryubha.
Ataabhatuurya kwa okurekana na amakorwa geenyu, kwa
ego, omuntu wowonse atariija okwigungya.

Abharuumi 10:9,10

Amang'ana gayo niiga, hanú oraagambe kwa omunwa
gwaho omwene ega, "Yeesu m-Mukuru," na okwikirirya
mumutima gwaho ega, Waryubha yaamuhyukya okurwa
mubhaku, orituuribhwa na Waryubha. Omuntu
akaamwikirirya Yeesu Kiristu kwa omutima gwaye
gonsego, nho arabharwa okubha omuheene embere ya
Waryubha. Akaagamba kwa omunwa gwaye ega,
aramwikirirya, nho araturibhwa.



Yoana 3:16,17 Waryubha yaahanja bhukong'u abhantu bhonsego bha mukyaró. Kiyó nkyó kyakora akatuma Omwana waaye omumwemwe yaaje mukyaró, naho, kira omuntu unú aramwikirirya atabhura, nawe, abhe na obhuhoru bhwa koko. Waryubha ataamutuma Omwana waaye mukyaró, naho abhaturire ekiina abhantu, nawe, abhatuurye okuhitira kuweeki.

1 Yoana 5:11-13 Obhwimiririri bhuyo m-bunu, Waryubha atuheeri obhuhoru bhwa koko. Na obhuhoru bhuyo, twabhunyooreri kwa enjira ya okumwikirirya Omwana waaye. Omuntu wowonse unú yaana obhumwi na Omwana wa Waryubha, yaana obhuhoru bhuyo. Nawe, unú ataana obhumwi nawe, ataana obhuhoru bhuyo. Mbang'ooreeri amang'ana ganu gonsego, bheenyu bhanú mureekirirya eriina rya Omwana wa Waryubha, naho mumanye ega, muuna obhuhoru bhwa koko.



Mataayo 8-9; Mariko 1-2, 4;
Ruuka 4, 8; Yoana 2

Storyline by: Edward D. Hughes

Illustrated by: Byron Unger, Lazarus
and Alastair Paterson

Adapted by: E. Frischbutter; Sarah S.

Kabwa Bible (cwa) © 2022, Wycliffe Bible Translators,
Inc. All rights reserved.

<https://live.bible.is/bible/CWAWYI/GEN/1>

©2024 Bible for Children, Inc.

www.M1914.org

www.bibleforchildren.org

